

# LA ORGANIZACIÓN DEL ESPACIU AGRARIU NA PARROQUIA DE SAN CLOYO (UVIÉU)

*Margarita Fernández Mier*

## ENTAMU

El facer un estudiu etnográfico sobre l'espaciu agrariu nes parroquies d'Uviéu tien dos característiques fundamentales. Primero que, como queda claro nos artículos qu'apaecen nesti volume, la zona central d'Asturies tien una complexidá menor na organización del espaciu agrariu, al nun tener la diversidá d'espacios n'altura d'una zona de monte y, ser, poro, más homoxeneu l'usu del terrén. Per otru llau, nun podemos escaecer l'influxu que tien la ciudá na rodada d'Uviéu, que fizo porque se fueren dexando les actividaes primaries en favor del sector terciariu y, con ello, traxo la desestructuración de los procesos del trabayu agrícola y la perda del rexistru oral. Por eso, creemos que pue ser interesante nesti casu facer un pequeñu estudiu dende'l puntu de vista hestóricu que nos faiga entender cómo va surdiendo'l poblamientu, y con él, cómo se va iguando pasu ente pasu l'espaciu agrariu alreduer d'unos pueblos con raigaños que vienen de la dómina medieval.

La evolución hestórica d'esti pequeñu territoriu fizo que, anque tuviera mui cerca d'Uviéu y nuna zona d'Asturies, el centru, que sufrió cambeos importantes por ser l'espaciu onde se concentró la mayoría de la población n'Asturies, una parte de la parroquia —la docu-

mentada na dómina medieval— cuasi nun sufrió variaciones, porque l'atracción exercida pola capital fizo que la medría y esplotación de nueves zones de cultivu algamara, na dómina moderna, sitios que, anque anguaño pertenecen a la parroquia, nun taben poblaos na dómina medieval. Esto llevó a que se caltuvieren les estructures agraries nes zones onde s'alluga'l poblamientu orixinal, indicándonos la toponimia cómo tendríen que ser esos espacios que depués fueron colonizaos modernamente y, sobre manera, nel sieglu xx.

Anguaño la parroquia ígüenla dos nuedos bien estremaos: lo que se conoz como *San Cloyo*, formao por dellos barrios pequeños, y *Villamar*, qu'apaez dientro de la parroquia como un pueblu en sí, siendo una unidá d'hábitat concentráu que tien alreduer tol so espaciu agrariu. La diferencia ente estos dos nuedos ta na existencia en San Cloyo d'un hábitat dispersu, mientres que Villamar presenta un hábitat concentráu, lo que va condicionar la organización del espaciu agrariu de los dos nuedos y la rede viaria, pola mor de que respuesten a una manera estremada d'organizar l'hábitat.

## EL POBLAMIENTU MEDIEVAL

Si analizamos les conseñes documentales a nuedos de la parroquia nos sieglos medievales, algamamos estos resultaos:<sup>1</sup>

— Sieglu x: Les «villae» de *Maxa*<sup>2</sup> y *Felech*.<sup>3</sup>

<sup>1</sup> Sabemos que la primer mención documental a una «villa» nun nos asegura qu'esa entidá de población naza nesi precisu momentu, porque pue ser mui anterior y que nunca nun fuera rexistrada nos documentos, pero, anque tengamos esto en cuenta, pola falta de noticies d'otra triba tenemos que trabayar namás coles que cuntamos.

<sup>2</sup> «...id est villas predominatas Flanzies, iusta palatium regis Ouetao, et uilla quod dicunt Aspera uibi (sic) dicunt Monte Flanni, uillare Maia, uilla Kauui, tyan terras quam etiam et pomares...» (a. 905). (FLORIANO LORENTE, P. (1968): *Colección diplomática del monasterio de San Vicente de Oviedo*: 34).

<sup>3</sup> «in illa uayga in uilla uocabulo Felectes, iusta flumine Nilone» (a. 931) (Ibid: 39).

- Sieglu XI: Les «villae» d'Areñes, *Pinnaria*, *Villarmil*<sup>4</sup> y la Ilesia de San Cloyo.
- Sieglu XII: La xuguería de *Ribero*<sup>5</sup> y la heredá de *Rubiera*.<sup>6</sup>
- Sieglu XIII: Los llugares de *Niévares*,<sup>7</sup> *Belovio*,<sup>8</sup> *Cortina*,<sup>9</sup> *La Llama*,<sup>10</sup> *Bobela*,<sup>11</sup> *L'Omeo*,<sup>12</sup> *Villabona* y *Villarruiz*.<sup>13</sup>

D'estes referencies, lo primero que destaca ye que toos estos nuedos allúguense nuna zona mui concreta de la parroquia: el vallín qu'igua El Maxuca, a la vera del que s'asitien los primeros nuedos de población, que son los que se menten nos sieglos X, XI y XII y onde entá nel XIII se ve l'apaición de referencies nueves a llugares habitaos.

Sicasí, analizando d'una manera más fondera l'allugamientu d'estos llugares, vemos que nel sieglu XII va producise un cambéu pequeñu na tendencia d'ocupación del territoriu porque, si nos sieglos X, XI y XII el poblamientu va concentrarse nes dos lladeres

<sup>4</sup> «...Do eciam illud totum quod habeo in Felectas et senram de Re per suos terminos que iacet inter Uilla Armis et Felectas et Maia... » (a. 1176) (Ibid: 496).

<sup>5</sup> «...do illam hereditatem scilicet unam iugariam, que fuit de Petro Blanco, in Ribero, cum omnibus suis adadiacenciis et pertinenciis... » (a. 1170) (Ibid: 467).

<sup>6</sup> «...de una hereditate quam ahbui de domno Roderico Petri, meo tio, in com-bambatione, que uocatur Ruuiera et est in ualle Sancti Claudii, cum omnibus suis per-tinentibus que est etiam iusta flumen quos nominatur Nora... » (a. 1157) (Ibid: 408).

<sup>7</sup> «...Marti Martiniz de Neuares... » (a. 1237). A. S. P.: F.S.V.: Leg. XXXIII, númb. 976.

<sup>8</sup> «...Martin Pedriz de Veluui... » (a. 1242). A.S.P.: F.S.V.: Leg. XXXIII, númb. 982.

<sup>9</sup> «...Domingo Yannes de Cortina... » (a. 1261). A.S.P.: F.S.V.: Leg. XXIV, númb. 710.

<sup>10</sup> «... de nuestra hereditate quam habemus in Valle Sancti Claudii in uilla per-nominata in illa uilla que dizent Lama... » (a. 1227). A.S.P.:F.S.V.: Leg. XXXII, númb. 959.

<sup>11</sup> «... Fernan Martiniz de Vouela confirmat. Pedro Iohannis de Vouela... » (a. 1242). A.S.P.: F.S.V.: Leg. XXXIII, númb. 982.

<sup>12</sup> «... quantos pumares auemos conuusco enna losa que lamant Aulaneda en Vouela, cerca el Homedo... » (a. 1244). A.S.P.: F.S.V.: Leg. XXXIV, númb. 996.

<sup>13</sup> Estos dos nuedos que pertenecen a la parroquia vecina de Sograndio, apaecen mentaos nun apéu de los bienes pertenecientes al Conceyu d'Uviéu, fechu en 1290: A.A.U.: Caxa 18, núm. 13.

d'El Ríu Maxuca, dende'l sieglu XIII entama a ocupar una zona nueva, dalgo alloñada del valle qu'igua El Maxuca, y que s'atopa cerca d'El Nora. Son los nuedos de *Niévares*, *Belovio*, *Cortina* y *Rubiera*.

El vallín d'El Maxuca yera un territoriu importante onde se concentraben munches de les «villae», y éstes atraen a otres de manera que van apaeciendo na rodiada nuedos nuevos, ensin dulda rellacionaos colos anteriores. Asina, nel sieglu XIII apaecen mentaos per primer vez *La Llama*, *Bobela* y *L'Omeo*, aumentando los llugares habitaos del valle. Ye perinteresante destacar la etimoloxía de dalgunos d'estos topónimos, porque tanto *La Llama* como *L'Omeo* faen referencia a delles variedaes vexetales, lo que nos fala d'un sitiu rozáu p'asitiar un nuedu d'hábitat.

De la que van aumentando los topónimos d'esta zona, paez que s'entama a colonizar un sitiu mui cercanu a esti vallín. Ente finales del sieglu XII y principios del sieglu XIII empiecen a apaecer les menciones a cuatro nuedos averaos a El Nora: *Rubiera*, *Belovio*, *Niévares* y *Cortina*. Estos cuatro sitios son anguaño barrios de San Cloyo, separaos unos cien o doscientos metros unos d'otros y alreor d'una llombuca. El so espaciu agrariu esplótalú caún d'ellos en delles partes y n'otres esplótenlu ente los cuatro barrios.

Pue que los habitantes d'estos llugares nuevos tuvieren dalguna rellación colos de los pueblos asitiaos cabo El Maxuca porque, ensin que se ficiera un estudiu fondu sobre'l tema, echando namás una güeyada a la documentación, vemos que los testigos qu'apaecen nos documentos d'estos barrios pertenecen a les entidaes enantes mentaes y lo mesmo pasa al revés.

Ye posible pensar na colonización d'espacios cercanos por families que vienen de sitios más antiguos onde la evolución del poblamiento nos sieglos anteriores, y nesi mesmu momentu, densificara la ocupación del espaciu.

Estos nuedos preséntensenos anguaño —sacante la medría que nestos años postreros tuvieron les nueves construcciones— con dos

caseríes.<sup>14</sup> *Belovio* tien dos nuedos, *Belovio d'Acá* y *Belovio d'Allá*, y dambos son dos caseríes que tienen xuntes les dependencies, y qu'igüen una única quintana. L'espaciu pal pan ta más p'allá d'estes dependencies. Dalgo asemeyao pasa en *Niévares* —dos cases—, mientras qu'en *Rubiera* y *Cortina* namás hai una casa.

## L'ESPACIU AGRARIU

Enantes d'entamar l'estudiu fonderu de los pequeños nuedos documentaos na dómina medieval, tenemos qu'echar una güeyada a la toponimia de tola parroquia, porque onde se concentra la mayor parte de los topónimos, y onde la división de tierres ye mayor, y nes zones onde tán los nuedos más vieyos; cuando falamos d'estos nuedos, referímonos a los qu'apaecen mentaos nos sieglos X, XI y XII, y a los qu'empiecen a apaecer na documentación yá nel sieglu XIII.

L'espaciu de la parroquia onde nun se menten llugares poblaos na dómina medieval tien una toponimia na qu'un nome fai referencia a una gran estensión de tierra; y la so etimoloxía indícanos, o bien el so calter d'espaciu d'esplotación nueva, como puen ser *Los Novales* o *Novalín*, o bien referencies al monte, como nel casu de *Momayor*, *El Monte*, *Monterréi* o *La Lloral* y *La Lloralina*, que faen referencia a la existencia de *lloreros*.

Otres vegaes el topónimu, refiriéndose a un gran espaciu de terrén, rellaciónase con dalgún tipu de construcción na zona, ensin qu'ello paeza que tea rellacionao con un poblamientu, polo menos

<sup>14</sup> La *casería* asturiana, anguaño y na dómina moderna, ye la unidá de producción nel mundu rural y nella inxértense la casa coles sos dependencies, los terreninos pal güertu, les tierres de pan y los praos, amás de los derechos d'aprovechamientu del monte comunal. La so cadarma ye heredera d'otra unidá d'esplotación qu'apaez documentada nel mundu asturianu medieval, la *xuguería*, que presenta unes característiques asemeyaes.

non un poblamientu que ponga esi espaciu dafechu n'esplotación agrícola, como ye'l casu d'*El Pontón*, con un nome que quiciabes vien d'una construcción d'estes característiques nesi llugar pa que'l camín que vien d'Uviéu puea pasar un regatu qu'hai ellí.

Toos estos llugares mentaos tán anguaño ocupaos, pero inda se conserven zones de monte onde atopamos topónimos como *El Monte Casarín* o *El Monte la Reguera*, qu'entá caltienen el so calter d'espaciu non rozáu.

Comparándolos con estes zones, los sitios de los que venimos falando, como les entidaes de población surdies na dómina medieval, presenten una mayor densidá de topónimos y, anque hai grandes zones nomaes con un mesmu términu, dientro d'elles atopamos otros topónimos que se refieren a unidaes menores dientro d'esi espaciu, delles perpequeñes.

Hasta la organización del espaciu agrariu ye distinta naquellos nuedos que primero apaecen na documentación, los que daten de los siglos X-XI-XII y los qu'apaecen nel XIII.

Pa ilustrar meyor estes diferencies, vamos analizar dos exemplos del espaciu agrariu, sofitándonos nel Mapa Topográficu Parcelariu del añu 1956, escala 1: 2.000, del Institutu Xeográficu Catastral, onde se conserva la morfoloxía d'estos nuedos.

Vamos tomar como primer exemplu'l llugar que güei llamen Villaverde (fig. 1). Asítiase xunto al terrén onde tuvo la ilesia vieya de San Cloyo, cola fábrica datada del sieglu XII,<sup>15</sup> y de la que tenemos la primer referencia documental nel sieglu XI.<sup>16</sup> El topónimu Villaverde nun apaez documentáu hasta la metá del sieglu XVII,<sup>17</sup> pero nel sieglu XI méntase la «villa» de «Pinnaria»:

<sup>15</sup> MANZANARES, Joaquín (1955): *La Antigua Iglesia de Santa María de San Cloyo*, Uviéu.

<sup>16</sup> «...et secus flumen Naura ecclesiam Sancti Claudi cun suis familiis et omnibus bonis tertiam partem ab omni integritate... » (a. 1086). (GARCÍA LARRAGUETA, S. (1962): *Catálogo de los documentos de la Catedral de Oviedo*, Uviéu: 261-263).

<sup>17</sup> A.S.P.: F.S.V.: Leg. LXI, númb. 1822.

«...una que vocitant Pinnaria, iuxta ecclesiam Sancti Claudi et alia que uocitant Arennas, iuxta ribulo Maia». <sup>18</sup>

El so asitiamientu xunto a la ilesia de San Cloyo nun dexa duldes, refiriéndose entós a lo qu'anguaño nomen Villaverde (1), qu'en dalgún momentu del medievu cambió'l so nome y de «Pinnaria» pasó a llamase *Villaverde*.

L'espaciu agrariu d'esti nuedu estructúrase al rodiu del sitiu d'hábitat y de la ilesia vieya. Anguaño tien cinco caseríes, toes elles axuntaes y con dellos güertinos ente medies. L'espaciu que lu arrodiada ta cuasi dafechu llendáu por caminos; dalgunos son vías de comunicación importantes y otros son caminos de pasu a delles unidaes del espaciu agrariu. Cuatro topónimos refiérense a dalgunes unidaes espaciales llendaes por caminos. La zona mayor ye la que llamen *Sopalacio* (2), que tien un significáu que ta de xuru venceyáu con una construcción d'estes característiques asitiada nel nuedu d'hábitat. Esti llugar ta llendáu pel oeste pol camín que comunica *Villaverde* con *Maxa*, mientras que pel este llenda en parte con un camín pa entrar dientro.

Esti espaciu ta dixebráu en milenta tierruques, caúna col so nome diferente, anque munches vegaes topamos el nome de *bringa*, cachín de tierra de forma allargada que val pa nomar un espaciu dientro d'una unidá mayor. L'otru topónimu que se refier a un espaciu grande ye *Valdesancloyo* (3), onde tamién hai estayes, nesti casu mayores, pero nelles nun hai una toponimia que les individualice. Ta llendáu pol camín que vien d'Uviéu y qu'acababa na Ilesia, y pol camín que dende *La Llama* (4) —«villa» documentada nel sieglu XIII— llegaba hasta la mentada Ilesia.

Ente ellos hai un terrén qu'anguaño ta a castañales y que llamen *El Bozo* (5). Amás d'estos tres grandes nuedos agrícolas hai un terrenín cabo la ilesia, nomáu *La Güerta'l Sacristán* (6), pergrande

<sup>18</sup> FLORIANO LLORENTE, P. (1986): *Ibid.*: 175.

y ensin nenguna dixebra interna y que sedría'l términu que correspuende a la ilesia. Amás, xunto a les cases hai espacios que debíen dedicase a güertos, onde s'echaríen berces, llechugues, cebolles...

Más p'allá d'estos términos tán los espacios agrarios de *Maxa*, *La Llama* y *Cotayón* (ésti apaez documentáu per primer vegada nel sieglu XVI).

Tanto Sopalacio como Valdesancloyo, dos unidaes iguaes por tierres pequeñes o bringues separtaes unes d'otres por sucos o fin-sos, respunden a la estructura de les *morteres*, nome que-y dan na zona a les eríes; estes son «el elemento principal del terrazgo aldeano en el que se realizan las cosechas de cereales y que servían igualmente de pasto para el ganado, una vez que alzadas las mieses, se convertían en rastrojo».<sup>19</sup>

Del funcionamientu d'estos espacios hai que destacar el so calter semicolectivu porque, aunque mientres se dedica al pan trabáyase de manera individualizada, de la que se cueye la collecha pasa a ser d'esplotación colectiva pa tolos que tienen ellí una estaya. Sicasí, nun hai alcordanza d'estos trabayos na parroquia, y anguaño caún trabaya la so tierra de manera individual y yá nun s'alcuerda del mantenimientu de la derrota.

Xunto al espaciu del pan hai n'El Bozo un sitiu de monte, que sedría productor de castañes, valdría p'alimentar al ganáu y daría *estro* pa les cuadres. La densidá del poblamientu nesta zona mengua la posibilidá de que l'espaciu agrariu aumente porque nun queden ente unes y otres entidaes espacios ermos, sinón que se ve un aprovechamientu total.

Si analizamos la estructuración agraria de los otros cuatro nuedos que venimos mentando, *Rubiera*, *Niévars*, *Belovio* y *Cortina* (fig.2), vemos que ye dalgo estremao. Caún d'estos llugares tien a la vera güertos y güertes. La güerta siempre ta apegada a la casa,

<sup>19</sup> GARCÍA FERNÁNDEZ, J. (1980): *Sociedad y organización tradicional del espacio en Asturias*. Xixón: 91.



garra un espaciu grande y cada casa tien una. Más p'allá d'esti espaciu y con una morfloxía paecida a la que vimos hasta agora, pero dalgo más pequeñes, atopamos les *morteres*, una en caún de los nuedos: en *Niévares* (1) la de *Castañera*<sup>20</sup> (2), que garra una solana que cai pa El Nora. Ente los dos *Belovios* (3) hai otra pequeña nuna solana (4). Frente a *Cortina* (5), la mortera de *Granda* (6) garra un bon pedazu tamién de solana, y nel centru d'esos cuatro nuedos ta la de *Sotiello* (7) y *El Monte Pachón* (8). Pero nesti esquema onde cada llugar tien la so ería, atopámonos con que *Rubiera* (9), que yá sabemos de la so existencia en 1157, nun tien l'espaciu iguáu asina, sinón que paez qu'esa heredá ye un términu grande averáu a la casa, al que se-y da'l mesmu nome (10); quiciabes ye que *Rubiera* fuera un nuedu más grande (porque en 1501 méntase como aldea)<sup>21</sup> y qu'esti espaciu que lu arrodiá y qu'agora llamen a too *Rubiera*, se correspondiera coles zones de güertes y praos, mientras que'l so terralgu taría na mortera de *Sotiello*.

Esta organización repítese en caún d'estos barrios: cases cola so güerta y dalgún prau, un espaciu pequeñu de terralgu iguáu igual qu'una mortera, y cerca d'él, llendando coles cases y les morteres, espacios de monte, altu y baxu, como pasa con *El Monte Pachón* ente *Cortina* y *Rubiera*, y *El Monte la Teyera* y *El Castañeo* en *Niévares*, ocupando estos la tierra menos granible pola mor de la solombra y les corrientes d'agua.

Ésta ye la estructura d'estos cuatro llugares, pero más allá d'estos términos, como un cinturón que los abarca a toos, podemos albidrar, peles noticias documentales o pela toponimia, un bon cachu

<sup>20</sup> «...una tierra labradía quel dicho monasterio ha en el lugar que dizen Espinedo, en la hería de Castanera que es en la feleigresía de San Cloyo, en que puede aver un dia de bues poco mas o menos... » (1456). A.S.P.: F.S.V: Leg. LXXII, númb.2134.

<sup>21</sup> «...las dichas abadesa, priora e monjas e convento...tenían una casa e un orrio en Rubiera con ciertos bienes de heredades e predos e lantados que havían en la dicha aldea de Rubiera e sus terminos... » FERNÁNDEZ CONDE, F. J. (1993): *El señorío del Cabildo de Oviedo. Estructuras agrarias de Asturias en el tardo medievo*. Uviéu: 389).

de monte, lo que nos ayuda pa reconstruyir cómo s'esplotó esti terrén nos siglos XII-XIII: surden una riestra d'entidaes de población que derruempen un terralgu nuna zona bona pa la llabranza, llana y soleyera y quiciabes ocupada por un monte de lo qu'entá queda dalgo alrededor d'estos llugares, naquellos sitios menos favorecíos, conservándose les castañales y carbayos. Si atendemos a la toponimia, podemos ver que pal oeste de toos estos sitios, hai un terrén grande que llamen *El Monte* y *El Monte la Reguera*, pel norte *El Castaño de Niévars* llega hasta un regatín y pel este tán *Ponteo* y *Espriella*, llugares qu'apaecen na documentación en 1353 como terrén a castañales.<sup>22</sup>

Asina vemos cómo foi'l procesu d'ocupación de les veres d'estos dos ríos, El Nora y El Maxuca al pasar pela parroquia de San Cloyo, al empar que se pue reconstruyir el so espaciu económicu dende la toponimia y les pervivencies del catastru medieval nel paisaxe d'anguaño.

## VILLAMAR

Villamar pertenez a la parroquia de San Cloyo; tien un hábitat concentráu, colos güertos pequeños y les güertes dalgo mayores xunto a les cases, como un aniellu que les zarra. Esti espaciu garra tanto'l nuedu orixinariu del pueblu como otros barrios pequeños que surdieron alrededor d'él (fig.3).

Dientro del nuedu que consideramos más vieyu había una torre de la qu'entá queda'l topónimu; al pie del barriu que llamen *La*

<sup>22</sup> «...e otra tierra con çinco castannares que iaz enna Nabaliega que afronta en el omeredal, et el medio castannedo de Binille, con sua heredit et el terçio de las castannares de La Aspriella... Et los tres ochavos con sua tierra del castannedo del Ponteado de Ferrera, que iaz entre ambos los castannedos de herederos de Alfons Deguez, et nueue castannares con ssua tierra que estan al molino de Pontedo...» A.S.P.: F.S.V.: Leg. LXI, númb. 1822.

*Torre*, hai un espaciu mui ampliu llamáu *El Monte Solatorre* (1 y 2) que, como'l so nome nos diz, quiciabes fuera un sitiu con árboles —anguaño son praos— y tuviera venceyáu a un señor feudal, lo mesmo que la so construcción. La parte más vieya d'esti nuedu tien les caseríes axuntaes, con güertinos ente elles; en rellación colos caminos apaecen caseríes dalgo alloñaes del nuedu orixinariu que tienen una traza distinta porque tienen unos terrenos pergrandes apegaos a la casa.

Les zones onde se sema'l pan axúntense bordiando'l nuedu d'hábitat: una gran unidá agraria —*La Mortera* (3)— espárdese per una llanada mui soleyera, llendando col términu del pueblu vecín de Villamosén. L'espaciu qu'anguaño se llama *El Bravo* (4), que ta ocupáu por una casería, ye un llugar documentáu na dómina medieval como una unidá agraria llamada *Palacio*;<sup>23</sup> cuatro topónimos qu'apaecen na descripción medieval: *El Regueru les Mueles*, *La Llan-tada*, *Fompipe* y *El Camín Real*, allúguennos esti espaciu averáu al hábitat y separtáu de *La Mortera* que mentemos enantes pel camín que va de Villamar al pueblu vecín, Villamosén. Quiciabes hubiera otra unidá agraria nel sitiu que llamen *Les Pedroses* (5), qu'apaez nel XVII asina, pero que nun tien una morfoloxía mui clara y, polo tanto, podría ser una ampliación seronda del terralgu, pero entá na dómina medieval. Ente éstos dos últimes hai un terrén grande llamáu *La Viña* (6) qu'ensin dulda ye'l términu guardáu dientro'l pueblu pa esti cultivu. Nun tenemos noticia documental de viñes en Villamar, pero sí n'otres partes de la parroquia —San Cloyo— nel sieglu XIII,<sup>24</sup> y ye perconocíu'l so espardimientu nos siglos baxo-medievales.

<sup>23</sup> FERNÁNDEZ CONDE, Francisco Javier. et al. (1991): *El monasterio de San Pelayo de Oviedo. Historia y fuentes*, vol. IV. Uviéu: 42-45.

<sup>24</sup> FERNÁNDEZ MIER, Margarita (1992): *Poblamiento y hábitat en la Edad Media asturiana. El ejemplo de una parroquia rural ovetense. San Cloyo*. Uviéu: 139. [Trabayu d'investigación ensin asoleyar].

Completando esti segundu aniellu alrededor del nuedu d'hábitat, hai una zona cercana a *El Monte Solatorre* y a *La Mortera* qu'indica, per un llau, espacios a prau —*El Pradón* (7)— y per otru, terrenos de puesta nueva n'esplotación —*Los Novales* (8)— ganaos al monte pa dedicalos a la ganadería nun momentu d'expansión económica que nun podemos precisar. Averaos a estos praos hai otros onde hai munches fontes que, pola mor de les sos característiques y la posibilidá del riego, yeren afayadizos pal pastu.

Alredor d'esti términu hai una mata. Pal este, *El Monte* y *El Corquedal* (9) son topónimos que se refieren a un espaciu grande y que, ensin dulda, indiquen la existencia de mata, qu'entá se caltién en parte. Pal oeste, tol espaciu qu'anguaño llamen *Socobal* (10) (so la cueva) sedría tamién un sitiu de mata, porque ye terrén avisío, traviésalo una corriente d'agua y ye poco afayadizo, polo tanto, pa trabayalo, siendo un sitiu más apode pa que se conserve la mata y aprovechar tolos productos que pue ufiertar.